



GIPUZKOAKO FORU ALDUNDIA

OGASUN ETA FINANTZA DEPARTAMENTUA

2016ko azaroaren 16ko 533/2016 FORU AGINDUA, araudi erkidera bilduta dauden zergadunek sozietateen gaineko zergaren ordainketa zatikatuak egiteko erabili beharreko 202 eta 222 ereduak onartzen dituena.

Maiatzaren 13ko 12/2002 Legeak, Euskal Autonomia Erkidegoarekin sinatutako Ekonomia Ituna onartzen duenak, 14. artikuluan dio zerga helbidea Euskal Autonomia Erkidegoan duten subjektu pasiboentzat sozietateen gaineko zerga araudi autonomoaren menpe dagoen zerga itundua dela.

Hala ere, artikulua horretan jasotakoaren arabera, aurreko ekitaldian 7 milioi eurotik gorako eragiketa bolumena izan duten subjektu pasiboek ekitaldi horretan beren eragiketa bolumenaren %75 edo gehiago lurralde erkidean egin badute, lurralde horretako araudira geratuko dira lotuta.

Era berean, Ekonomia Itunak 21. artikuluan xedatzen du ez-egoiliarren errentaren gaineko zerga tributu itundua dela, Estatuak une bakoitzean ezartzen dituen edukizko eta formazko arau berberei jarraituta erregulatuko dena.

Aurrekoa hala izanik ere, atzerrian egoiliar diren pertsona edo entitateek Euskal Autonomia Erkidegoan helbideratuta duten establezimendu iraunkorrei lehenago aipatutako 14. artikuluan jasotakoa aplikatuko zaie.

Azaroaren 27ko 27/2014 Legeak, Sozietateen gaineko Zergarenak, 40. artikuluan ezartzen duenez, apirileko, urriko eta abenduko lehen 20 egunen barruan, zergadunek ordainketa zatikatu bat egin beharko dute hilabete horietako lehen egunean abian den zergaldiko likidazioaren kontura.

Era berean, xedapen horretan araututa daude ordainketa zatikatuak egiteko epeak eta modalitateak.

Bestetik, martxoaren 5eko 5/2004 Legegintzako Errege Dekretuak, Ez-egoiliarren Errentaren gaineko Zergari buruzko Legearen testu bategina onartzen duenak, 23. artikulua 1. apartatua xedatzen duenez, errentak establezimendu iraunkor bidez lortzen dituzten zerga horren zergadunak behartuta egongo dira haren konturako ordainketa zatikatuak egitera, sozietateen gaineko zergari lotutako entitateentzat ezarritako modu berean.

Aipatutako legearen 38.3 artikulua obligazio bera ezartzen du errentak esleitzeko araubidean dauden entitateentzat, baldin eta entitate horiek, atzerrian eratuak izanik, lurralde espainiarrean egiten badute jarduera ekonomiko bat, eta jarduera hori, dela bere osoan dela zati batean, edozein motatako instalazio edo lantokietan garatzen bada ohikotasunez edo modu jarraituan, edo lurralde horretan jarduten bada entitatearen izenean eta kontura, kontratatze baimendutako agente baten bitartez.

Babes juridikoa antzekoa zelarik (orduko denbora eremura egokitua) onartu zen abuztuaren 12ko 714/2010 Foru Agindua, araudi erkidera bildutako subjektu pasiboek sozietateen gaineko zergaren ordainketa zatikatuak egiteko erabili beharreko 202 eta 222 ereduak onartu zituen. Horrela geratu ziren onartuta adierazitako obligazioak Gipuzkoako foru esparruan betetzeko erabili beharreko eredu espezifikoak. Beraz, foru agindu hori izan da, onartu zenetik, araudi erkidera bildutako zergadunek ordainketa zatikatuak egiteko obligazioaren konplimendua arautu duena.

Gipuzkoako Foru Aldundiak eta inguruko zerga administrazioek eredu horien kudeaketan bereganatu duten eskarmentua aintzat hartuta, komenigarritzat jo da ereduak aurkezteko modua aldatzea eta aldez aurretik prestatutako fitxategien aurkezpen telematikoaren ordeztu formulario bidezko aurkezpena ezartzea. Formulario hori «Gipuzkoataria» tramite eta zerbitzu telematikoen atarian izango da eskura, Gipuzkoako Foru Aldundiaren egoitza elektronikoan, <http://www.gipuzkoa.eus> helbidetik sartuta.

Bide batez, aukera aprobetxatzen da foru aginduaren edukia eguneratzeko, bai araudiari egiten zaizkion aipamenetan, bai doitutako zenbait prezeptutan, eta bai arlo terminologikoan.

Horiek horrela, hau

1. artikulua. Sozietateen gaineko zergaren eta ez-egoiliarren errentaren gaineko zergaren konturako ordainketa zatikatuak egiteko 202 eta 222 ereduak onartzea.

1. Onarturik geratzen da 202 ereduak, honela izendatu dena: «Sozietateen gaineko zerga. Ez-egoiliarren errentaren gaineko zerga (establezimendu iraunkorrak, eta errentak esleitzen dituzten entitateak, atzerrian eratuak izanik lurralde espainiarrean ere badirenak). Ordainketa zatikatua», foru agindu honetan I. eranskin gisa ageri dena.

2. Onarturik geratzen da 222 ereduak, honela izendatu dena: «Sozietateen gaineko zerga. Bateratze fiskaleko araubidea. Ordainketa zatikatua», foru agindu honetan II. eranskin gisa ageri dena.

2. artikulua. 202 ereduak aurkeztera behartuak.

1. Hurrengo 2. eta 3. apartatueta aipatzen diren zergadunak daude behartuta 202 ereduak erabiltzera, eta, zehazki, Euskal Autonomia Erkidegoarekiko Ekonomia Itunak, maiatzaren 23ko 12/2002 Legearen bidez onartuak, 17. artikuluan ezarritakotik ondorioztatzen den ordainketa zatikatua Gipuzkoako Foru Administrazioari egiteko erabiliko dute.

Dena den, ateratzen den emaitza negatiboa bada, ez da beharrezkoa izango 202 ereduak aurkeztea.

2. Sozietateen gaineko zergaren eta ez-egoiliarren errentaren gaineko zergaren konturako ordainketa zatikatuak egiteko erabili beharra dago 202 ereduak (ez-egoiliarren artean, establezimendu iraunkorrek, eta errentak esleitzen dituzten entitateek, atzerrian eratuak izanik lurralde espainiarrean ere badirenek, erabiliko dute). Ordainketa horiek egin beharra jasota ageri da Sozietateen gaineko Zergari buruzko azaroaren 27ko 27/2014 Legearen 40. artikuluan, martxoaren 5eko 5/2004 Legegintzako Errege Dekretu bidez onartutako Ez-egoiliarren Errentaren gaineko Zergaren Legearen testu bategineko 23. eta 38.1 artikuluetan, eta Estatuko aurrekontu orokorreari buruzko legeek urte natural bakoitzerako ezartzen dituzten xedapenetan.

Aurrekoa hala izanik ere, talde fiskalen kasuan, kooperatiba taldeak barne, baldin eta talde horiek tributatzen badute Sozietateen gaineko Zergari buruzko azaroaren 27ko 27/2014 Legearen VII. tituluko VI. kapituluan eta azaroaren 6ko 1.345/1992 Errege Dekretuan, mozkin bateratuaren gaineko tributazioari buruzko xedapenak sozietate kooperatiben taldeei egokitze arauak ematekoan, ezarrita dagoen zerga araubide bereziaren arabera, ezingo dute 202 ereduak erabili ordainketa zatikatua egiteko, eta, horrelakoetan, 222 ereduak erabili beharko dute beti.

3. Espainiako interes ekonomikoko taldeak eta aldi baterako enpresa elkarteak bilduta badaude Sozietateen gaineko Zergari buruzko azaroaren 27ko 27/2014 Legearen VII. tituluko II. kapituluan jasotzen duen araubide berezira,

ez dira inolaz ere behartuta egongo 202 eredua aurkeztera, partaidetza por-tzentaje osoa egoitza lurralde espainiarrean duten bazkide edo kideena denean.

3. artikulua. 222 eredua aurkeztera behartuak.

1. Hurrengo 2. apartatuan aipatzen diren zergadunak daude behartuta 222 eredua erabiltzera, eta, zehazki, Euskal Autonomia Erkidegoarekiko Ekonomia Itunak, maiatzaren 23ko 12/2002 Legearen bidez onartuak, 20.2 artikuluan ezarritakotik ondorioztatzen den ordainketa zatikatua Gipuzkoako Foru Administrazioari egiteko erabiliko dute.

Dena den, ateratzen den emaitza negatiboa bada, ez da beharrezkoa izango 222 eredua aurkeztea.

2. Azaroaren 27ko 27/2014 Legearen VII. tituluko VI. kapituluan eta azaroaren 6ko 1345/1992 Errege Dekretuan ezarritako zerga araubide bereziaren arabera tributatzen duten talde fiskalek, kooperatiba taldeak barne, nahitaez erabili behar dute 222 eredua, Sozietateen gaineko Zergari buruzko azaroaren 27ko 27/2014 Legearen 40. artikuluan eta Estatuko aurrekontu orokorreari buruzko legeek urte natural bakoitzerako ezarritako xedapenetan aurreikusitako ordainketa zatikatuak egiteko.

4. artikulua. 202 eta 222 ereduak aurkezteko epea.

Urte natural bakoitzeko apiril, urri eta abenduaren lehen hogeiei egun naturalen barruan aurkeztu behar dira foru agindu honetan onartutako 202 eta 222 ereduak.

Epemugak egun baliogabeetan gertatuz gero, hurrengo lehen egun baliodunean amaituko dira.

5. artikulua. 202 eta 222 ereduak aurkezteko modalitateak eta ordaintzeko moduak.

1. Bide telematikoak baino ezingo dira aurkeztu foru agindu honetan onartutako 202 eta 222 ereduak.

Dagokion ereduaren formulario elektronikoa behar bezala betez eta transmitituz egingo da aurkezpen telematikoa. 202 eta 222 ereduaren formulario elektronikoak Gipuzkoako Foru Aldundiaren egoitza elektronikoan izango dira eskuragarri.

Formularioa eskuratzeko eta transmisioa egiteko, aintzat hartuko da urtarrilaren 4ko 1/2016 Foru Aginduak, Gipuzkoako Lurralde Historikoko zergen foru Administrazioarekiko harremanak bide elektronikoz izateko obligazioa arautzen duenak, 2. eta 3. artikuluetan ezarritakoa.

Ondorio horietarako, 202 eta 222 ereduaren aurkezleek beren identitatea frogatu behar dute sinadura elektronikoko ziurtagiri baten bitartez edo, bestela, pasahitz operatibo bat erabiliz. Azken kasu horretan, pasahitz operatiboa eman behar da irailaren 28ko 23/2010 Foru Dekretuak, Foru Administrazioaren eremuan bitarteko elektronikoen erabilera arautzen duenak, 22. artikuluan xedatutakoari jarraituta eta Gipuzkoako Foru Aldundiaren pasahitz operatiboa arautzen duen foru aginduaren arabera.

2. 202 eta 222 ereduetatik ondorioztatzen den ordainketa zatikatua aipatutako 1/2016 Foru Aginduak 4. artikuluan ezarritakoari jarraituz egingo da, hau da, bankutik helbideratuta edo, bestela, ordainketa-pasabidearen bitartez.

Xedapen indargabetzailea.

Indarrik gabe geratzen dira foru agindu honekin bat ez datozen maila bereko edo txikiagoko xedapen guztiak eta, bereziki, abuztuaren 12ko 714/2010 Foru Agindua, araudi erkidera bildutako subjektu pasiboek sozietateen gaineko zergaren ordainketa zatikatuak egiteko erabili beharreko 202, eta 222 ereduak onartzen dituenak.

Amaierako xedapena.

Foru agindu hau Gipuzkoako ALDIZKARI OFIZIALEAN argitaratu ondorengo egunean jarriko da indarrean, eta 2016ko abenduaren 1etik aurrera aurkeztekoak diren aitorpenetan izango du eragina.

Donostia, 2016ko azaroaren 16a.—Jabier Larrañaga Garmendia, Ogasuna eta Finantza Departamentuko foru diputatua. (7979)

I. ERANSKINA



II. ERANSKINA



